



Pres-konferencija nakon pet uvezanih akcija

Šahinpašić najavio nova hapšenja

Za kratko vrijeme **SIPA** izvela akcije na suzbijanju prometa drogom, duhana te izrade lažnih dokumenata za kriminalce

U prostorijama Državne agencije za istrage i zaštitu (**SIPA**) jučer je organizirana pres-konferencija, na kojoj je Vahidin Šahinpašić, vršilac dužnosti šefa Kriminalističko-istražnog odjela (KIO), prokomentirao niz operativnih akcija koje je ova policijska služba provela u posljednje vrijeme.

Teški kriminal

Prema Šahinpašićevim riječima, **SIPA** ulaže velike napore da prepozna i dokumentira teške oblike krivičnih djela koja se dešavaju u BiH i u proteklih pet dana provedene su operativne akcije "Snimak", "Papirus", "List dva", "Boks" i "Zenica".

- Očekujte da ćemo vrlo brzo imati nova hapšenja sa ciljem da rasvijetlimo krivična djela – istaknuo je Šahinpašić.

Kada je u pitanju akcija "Papirus", koja je završena prije tri dana, on je rekao da je akcija rađena u saradnji s Obavještajno-sigurnosnom agencijom BiH.

Šahinpašić je naglasio da su u ovom predmetu prepoznali ozbiljnu kriminalnu



S jučerašnjeg obraćanja novinarima

grupu, koja je vršila krivotvorenje isprava i krađu identiteta, da su utvrdili vremenski period trajanja grupe i dokazali sve ono što su suradili.

Naglasio je da su u ovoj operaciji uhapsili 10 osoba, dok za dvije još tragaju.

- Uspjeli smo dokazati da je grupa izradila 36 lažnih identiteta i isto toliko dokumenata BiH i izvršila krađu

42 druga identiteta - rekao je Šahinpašić te je dodao da su takvi dokumenti plaćani i do 10.000 eura, a lažni dokumenti su registrirani i na drugim kontinentima – kazao je Šahinpašić. Kako je naveo, jedna osoba je 17. jula u Peruu uhapšena s krivotvorenim dokumentima, a akcija je rađena u saradnji sa policijom Srbije, koja je prije nekoliko mjeseci u Srbiji pronašla dva laboratorija gdje su se proizvodili lažni dokumenti.

Lažni dokumenti

Šahinpašić je pojasnio da su ove osobe izradivale sebi dokumente u želji da ih iskoriste u međunarodnom prometu.

Šahinpašić je naglasio da su na teritoriji BiH u toku akcije "List dva" i "Boks", u kojima je **SIPA** prepoznala kriminalnu grupu i dokazala krivična djela nedozvoljenog prometa akciznim robama, a prije svega duhana.

- Ovo su združene akcije Uprave za indirektno oporezivanje BiH i **SIPA**-e. Mi smo u ovoj akciji lišili slobode 30 osoba, pretresli 42 lokacije na teritoriji BiH, pronašli veliki broj dokaza, među kojima je 25 tona duhana i šest mašina za proizvodnju i pakovanje duhana i u toku je kriminalistička obrada tih osoba, koje će danas biti predane u Tužilaštvo BiH - rekao je on.

Ad. A.

Zaplijenjena droga

Šahinpašić je podsjetio da su prije pet dana proveli akciju "Zenica", u kojoj su, zbog krivičnih djela zloupotreba droga, uhapsili tri osobe te zaplijenili

određenu količinu droge. Naglasio je da, u saradnji s kolegama iz Srbije i Crne Gore, nastavljaju aktivnosti radi potpunog dokumentiranja svih tih djela.